

Durànt lé treisième et l'quatorzième siècle, Guernési fut attatchi par les Français et lé Rouaï d'Angleterre, Edouard III, c'màndit qué l'île bâtisse aën mur autour la ville dé St. Pierre Port pour la protégier. Les Français avaient détruit la ville, et St. Samsaon, treis caoups –en 1294, 1336 et 1338. I s'en allait couaïr raide des sous, qui fait a n'fut pas bâtie pour tchiques onnaïes. En 1339 lé rouaï envyit des laetres au Gardien des Iles (Jean, Baron Mautravers), et insistit qué “ not'e ville dé Saint Pierre Port...” seït enfrumaïe par aën mur qu'était fort. Treis chents chinquante onnaïes pus tard, en accordànce dauve enn'Acte d'la Cour Royale, les Counétabbles d'la Ville c'màndirent qué six “Barrières dé la Villes” seïent mises autour d'la ville. Nous peut acaure en veir –i y en a ieune à la Rue des Forges à côtaï du viar Post Office. Ches jours, i y a enne pllacque qu'expllique qué chute pierre fut mise à haut par la Cour Royale en 1700 pour mertchier les Portes dé la Ville quand a fut enfrumaïe pour sa défense.

Pour bian d's onnaïes, i y en avait qui disaient qu'i n'y avait pas autcheun mur autour d'la ville, mais des dégraïs et des buts d'muraïlles qui furent trouvaïs à diff'rents temps fournirent d'l'évidànce caoncernànt lé passaï. Au meis d'juin, 1975, enne laongueur dé viar mur t'ni ensemble par d'l'arguile fut découvaert durànt du travas au Pollet. En 1980, John Macormack écrivit dans son magnifique livre “*The Guernsey House*”, qu'i y avait enne grànde diff'rence ente les maisons d'aën côtaï dé chu supposàï mur à l'aoute, bian pus qué rioque enne définitiaon légale. I suivit la laegne probablle du mur dé l'Eglise d'la Ville, lé laong du côti au sud ente la Rue des Côneets ossi lliàn qu'a rencaontre la piaèche éiouque qui soulait i aver enne tour, la Tour Beauregard, d'vânt qu'des dégraïs d'vallent à la Rue d'la Faontoine, éiouque nous peut veir enn'aoute Barrière dé la Ville. I caontinuit sa route par la Rue dé Berthelot à la Rue des Forges et la Barrière là. Oprès aver maontaï la Rue des Forges, i d'vallit avau Forest lane dauchet qu'il arrivit éiouque lé cabaret “Lé Thomas de la Rue” sé trouve ogniet. Près d'là, enn'achie, i y avait enne aoute tour, La Tour Gand, et pus lliàn la banque.

En an pus tard, i trouvit dans la cuisaine d'enne maisaon qu'il'tait à réparàir à Cliff Street, enne fosse du temps mediaéval. I y avait étout des morciaux dé pot'rie du quatorzième siècle qui paraïssait éte la preuve qu'i y avait aën mur là. Il est saure qu'i y avait les daeux tours mais nous peut pas éte saeure qu'i y avait aën mur tout autour d'la ville. P'tête durànt l'travas d'abbâtre et dev'lopaïr des bâtiments dans et autour d'la ville, tchiqu'un trouva la preuve qu'i nous manque à chu temps et nous pourra éte saeure qué Saint Pierre Port était enne ville fortifiàie i y a laongtemps.

Suivànt Edith F. Carey, dans enn'articlle en 1950, i y avait six Barrières dé la Ville qui mertchaient les portes dé la ville. I s'trouvaient à l'Eglise d'la Ville, à la Tour Beauregard au haut d'la Rue des Côneets, à la rue d'la Faontoine, à la rue Berthelot, à la Rue des Forges (à côtaï du viar Post Office), à la Tour Gand, (près dé Moore's Hotel). La pierre dans la Rue Berthelot a disparu.